

## Ebbes ferrs Abreesche

Omm Dinsdaachmoie hott mich moin ahle Kumpel Hubert oogerufe.

Hannes, hodder gesaad unn soi Stimm hott debei gons schee gewaggeld, Hannes, was ist denn los in dieser Welt. Nichts als Nachrichten über Mord und Totschlag, wo führt das alles noch hin! Jetzt die Sache mit dem Zug in Würzburg ... wo führt das hin?

Isch waaß aach nitt, habb isch ze Antwort gewwe, mir wisse joo, dass iwverall uff de Welt geschosse unn gestoche werrd, awwer jetz dut dess aach bei uns kumme. Merr getraut sich bald nimmi unner die Leit ze gieh aus Ängst, ess kennt irschend oom oifalle, er misst e paar von uns erschieße odder ersteche. Schlimm, gons schlimm!

Ja, seet de Hubert, ganz schlimm. Manchmal bin ich froh, dass ich so alt bin. Aber unsere Kinder und Enkel, was auf die alles zukommt, ich darf gar nicht daran denken.

Unn ess iss joo nitt nor dess Schieße unn Steche, saach isch. Gugg doch jetzt nooch Rio mett dene Olympische Spiele. Immer mieh Sportler und vor alle Dinge Sportlerinne saache ab, giehn nitt hie aus Ängst, die Zika-Migg deet se steche unn sie deede gons schlimm kronk werrn. Odder wenn die Sportmädcher Kinner krieg, dass die mett zu kloone Kebb unn mett Behinderunge uff die Welt kumme.

Doo moont de Hubert: Aber diese Art von Mücken und der Virus, den sie übertragen, kommen auch zu uns nach Europa und nach Deutschland, da kann man sicher sein. Auch weil es immer wärmer wird und immer mehr Wasser vom Himmel fällt. Und einen Impfstoff gegen den Virus gibt es noch nicht.

Hubert, saach isch, waaßde noch, wie mir alsemol mett de Fahrräder uff de Kiehkobb gefahrn sinn unn wie merr dort vunn dene Schnooke verstoche worrn sinn? Awwer nooch e paar Daach warn die Knubbele eweck unn ess iss nix hinnenooch kumme. Dess warn noch Zeide!

Ja, das waren noch Zeiten, seet de Hubert. Hannes, wir haben das Goldene Halbe Jahrhundert erlebt, von 1950 bis 2000. Diese fünfzig allerbesten Jahre in der Weltgeschichte gab es zuvor nicht und sie wird es nie mehr geben. Und wir haben sie erlebt.

No gut, saach isch, dess iss rischdisch, awwer mir Alde derrfe uns nitt allsfort uffreesche iwver dess was falsch leeft in de Welt.

Und wie machst du das, mein lieber Hannes?, frächt de Hubert.

Isch saach: Isch reesch mich joo monschmol iwver all dess Verkehrte uff, awwer wenn merr dess ze vill werrd, donn mach isch was, wie ...

De Hubert hott mich unnerbroche: Und dann, was machst du dann?

Isch saach derrs, Hubert. Wie gessdern Owend, doo habb isch uff die Terrass gesotze unn habb wie aach die Fraa in de Himmel geguggd. Noch long sinn die Mauerseeschler dorsch die Luft gesaust unn donn, alse fort warn, su geesche Zeh, sinn die Fleddermäus kumme unn die sinn noch schneller erumgeflicht. Unn donn hott de Mond su rischdisch rund dorsch die Beem geleuchd, no ja, su rischdisch voll werrderr joo erst heit Nacht. Awwer isch gugg merr den oo und denk, isch habb noch nie kapiert, dass der sich in oom Monat oomol um sich sellwer drehe dut, weil merr sieht doch alls nor die oo Seit vunn dem – unn meddem Iwverleesche hadd isch ebbes ferrs Abreesche gefunne.

Das muss ich auch mal probieren, seet doo de Hubert, ich werde es versuchen mit dem Blick auf meine wunderschönen Lilien im Garten, weil ich mich oft frage, warum duften die besonders am Abend so intensiv. Mal sehen, ob ich dadurch ruhiger werde.

Eiern Honnes